

Somo la 18

MAAFUNZO YA BIBLIA KUHUSU IBILISI (Sehemu ya 1)

"Kama watoto ni washiriki wa damu na mwili, yeye naye vivyo hivyo alishiriki yayo hayo, ili kwa njia ya kifo chake amwagamize yule, ambaye ana nguvu za mauti, yaani, Ibilisi "(Waebrania 2:14).

'Ibilisi' anachukuliwa kuwa mtu wa aina fulani na mwenye umaarufu sana katika dini ya Kikristo. Anadhaniwa kuwa yeye ni mungu wa uovu, na ambaye amefaulu zaidi kuliko Mungu mwenyewe, kwa misingi ya 'roho' zilizotekwa na kutawaliwa naye milele. Yesu anatwambia (Mathayo 7:13) kwamba - "mlango ni mpana, na njia ni pana iendayo upotevuni, na ni WENGI waingiao kwa mlango huo:"

'Kwa mujibu wa nadharia ya Ukristo wa jadi, hii ina maana kuwa mabilioni ya watu huenda motoni kupata mateso ya milele, chini ya utawala wa Ibilisi, bila matumaini yoyote kamwe ya kuepuka; katika (mstari 14) ...

"Mlango ni mwembamba, na njia imesonga, iendayo uzimani, na waionao ni wachache."

... ni wale wachache ambao Mungu ana uwezo wa kuwashawishi kufuata Njia Yake.

Kumbuka, 'kuzimu' kama inavyofundishwa na Ukristo wa jadi ni ya milele, kwa hivyo 'Ibilisi' wa mafundisho yao pia ni wa milele. Huu ni mfano mbaya unaowekewa sasa hali hii ya milele kwa ulimwengu huu mzuri: ya kwamba idadi kubwa ya watu ni watumwa wa Ibilisi wasio na matumaini na watakuwa katika mateso ya moto wa milele: mabilioni na mabilioni ya watu kuteswa milele kwa miaka 70 ya dhambi

Je, nadharia hii ni ya kimaandiko? Je, Biblia inatufunza dhana hii mbaya, ya **kutisha** na kuogofya? Je, inawezekana kwamba Mungu aliumba idadi kubwa ya watu kwa hatima ya kuishi maisha mafupi yasio na furaha, kisha wapige kelele wakiwa motoni kwa mateso ya milele baadaye?

Ingawa inaweza kuwa kweli kwamba mafundisho haya hayaungwi mkono na hayatiliwi msisitizo wa hapo awali, ingali ni sehemu isiyoepukika ya mafundisho rasmi ya dini za jadi. Picha hii haiwezi kuepukika. Ni lazima ikabiliwe kama matokeo yasiyoweza kutengwa na nadharia ya 'roho isiyoweza kufa', 'moto wa kuzimu', 'ibilisi mtu'. Wapende wasipende, 'Wakristo' wa othodoksi au jadi hawana budi kupambana na jinamizi hili la milele kwa kukuza na kuidhinisha nadharia hii mbovu.

Kwa mara nyingine, swali muhimu zaidi ni: Je, yapatikana katika maandiko? Somo hili, na somo lifuatalo, litazingatia kwa makini yale ambayo Biblia inasema kuhusu somo hili. KUNA IBILISI WA BIBLIA, tukubaliane, kuna baadhi ya pointi katika Biblia ambazo zinaoana na Ukristo wa jadi. Kweli Biblia inazungumzia 'ibilisi'. Wote wanamsawiri Ibilisi kama Adui Mkuu wa

wanadamu: mwenye hila, uovu na nguvu nyingi - ambaye lazima akabiliwe na kushambuliwa na kushindwa ili kupata wokovu na kuepuka adhabu ya milele. Hata hivyo, Biblia inajitenga na Ukristo wa jadi kuhusiana na aina na muda wa 'adhabu ya milele' kama tutakavyoona katika somo hili.

Ibilisi wa Biblia ni nani au nini? Je, tunajali kujua? Sana. Tukizingatia kwa ufupi tu suala hili tutaona kwamba ni muhimu kujua Ibilisi ni nani (au nini), na jinsi ya kufanikiwa katika kupambana na kumshinda (au kulishinda).

Ibilisi, kwa utenda kazi wake wote, kwa kawaida hujulikana kuwa Mwenye nguvu na Mwenye ujuzi wa yote, kwani anapokuwa anawashughulikia wale walio katika mateso ya moto wa milele kwa mabilioni ambao tayari wamo kuzimuni, yeye kwa wakati huo huo mmoja ana uwezo wa kuwajaribu watu wote waliopo hivi sasa duniani. Mtu yeyote ambaye ana uwezo wa kutawala mabilioni ya wanaoongezeka kila uchao milele ni dhahiri anakaribiana sana na Mungu kwa uwezo.

Ibilisi pia anasemekana kuwa hafi. Madhehebu mengine ya Kikristo hufundisha sana haya, baadhi yao hayafunzi - lakini kimantiki huchangia, kwani ikiwa kuzimu na mateso ya moto ni ya milele, basi Ibilisi hana budi kuwa wa milele pia. Ni wazi kuwa kuzimu haiwezi kujiendesha yenyewe: na kufikiria Ibilisi ataharibiwa, na kuzimu kuendeshwa milele bila yeye, hufanya taswira ya jadi kuendelea kukosa mashiko.

Lakini Biblia yasema nini? **MWENYE DHAMBI AISHIYE MILELE NI JAMBO LISILOWEZEKANA KIMAANDIKO.** Kama kuna jambo moja ambalo Maandiko yameweka wazi, ni kutotenganisha dhambi na mauti -- "Mshahara wa dhambi ni mauti" (Warumi 6:23).

"Roho itendayo dhambi, itakufa" (Ezekieli 18: 4).

"Kwa mtu mmoja dhambi iliingia ulimwenguni, na kupitia kwa dhambi hiyo mauti" (Warumi 5:12).

"Tamaa huzaa dhambi: dhambi huzaa kifo" (Yakobo 1:15).

Hii ni sheria ya Mungu isiyobadilika. Yeye yu mwema na ni mtakatifu, na ulimwengu huu ni wake. Haina nafasi kwa wenye dhambi waishio milele. Kutokufa kunahusiana tu na utakatifu. Wenye dhambi waishio milele ni ushirikina wa kipagani. Kuna wengi wao katika hadithi za mataifa. Vile vile, na juu ya nguzo hizo, mwenye dhambi aishiye milele ni jambo lisilowezekana kimaandiko.

Dhana ya kwamba Ibilisi ni 'malaika aliyetupwa chini kutoka mbingu takatifu ya Mungu kwa kuasi' ni uongo mbaya wa kutisha, unapotosha ukweli, wa mfano mzuri wa uhusiano maridadi alio nao Mungu na malaika watakatifu. Kama dhana hii ingekuwa ni kweli (tunamshukuru Mungu sivyo!), na kama uasi wa watakatifu wanaoishi milele unawezekana, basi sasa hali ya mbinguni miongoni mwa Malaika, na hali ya baadaye iliyohaidiwa milele ya

watakaokombolewa, ambao wanafaa kuwa 'sawa na malaika "(Luka 20:36), haiboreshi kwa vyovyote bonde hili la uovu, lenye kukosa uhakika na majonzi. Kama dhambi inawezekana katika maisha ya milele, hali ya kutopata uharibifu, basi kuna thamani gani? Jitihada ni ya nini?

IBILISI WA BIBLIA NI DHAMBI ILIYOHAIISHWA

Ibilisi wa Biblia ni DHAMBI: Dhambi katika kila kipengele na madhihirisho - hasa sana mzizi wa Dhambi: Dhambi katika mwili ', sheria ya Dhambi katika viungo ', asili na tabia ya mwili wa binadamu (tangu kuanguka kwa Adamu na hukumu) kuelekea kwa maovu, uovu na upinzani kwa Mungu na amri zake zenye hekima, takatifu, na yenye kutupa uzima.

Maandiko yanatwambia kuwa Yesu alikuwa mwenye asili ya kibinadamu, na akafa, kwa lengo kuu la KUMHARIBU IBILISI -- "Basi, kwa kuwa watoto wameshiriki damu na mwili, yeye naye vivyo hivyo alishiriki yayo hayo, ili kwa njia ya kifo amharibu yeye aliyekuwa na nguvu za mauti, yaani, Ibilisi "(Waebrania 2:14). Alishiriki udhaifu, hali ya kufa, mwili wa binadamu ili kwa kufa aweze 'kuharibu ibilisi' Tafakari ukweli huu wa maandiko kwa muda mrefu na pia kwa makini. Kuwa na uhakika inaambatana na dhana yako ya kuwa ibilisi ni nani, na jinsi ibilisi aliharibiwa na Kristo. Kifungu hiki kina ufunguo wa kuelewa somo hili.

Yeye alishinda nini? Je, alipigilia nini kwenye mti katika kukanusha na kuhukumu? - " ... kwamba kupitia kwa kifo chake amwangamize ibilisi" (Waebrania 2:14). "... ili aichukue Dhambi ya ulimwengu" (Yohana 1: 29).

"Azitangue dhambi kwa dhabihu ya nafsi yake" (Waebrania 9:26).

"Ili mwili wa dhambi ubatilike" (Warumi 6: 6).

Ni jambo wazi lisiloepukika kutokana na mistari hii kuwa Ibilisi wa Biblia sio hayawani wa Kikristo asiye wa ulimwengu huu. Inakuwa jambo la kipumbavu kusema kwamba Kristo alipewa asili dhaifu ya mwanadamu ili 'kupitia kwa kifo' aweze kuharibu kiumbe cha nguvu, kisichoweza kupatikana na mauti. Lakini, kwa maisha yake safi na ya hiari, kifo chake cha kidhabihu, aliharibu ndani yake 'ibilisi' wa Biblia na kazi zake. Alishinda na kufanya dhambi iwe na unyonge 'mwenendo wa Dhambi' - 'sheria ya Dhambi katika viungo' au 'Dhambi katika mwili' ambao Paulo anazungumzia - hatimaye ushindi kwa kuipigilia dhambi mtini kwa ushindi mkuu katika kuhukumu dhambi na kumthibitisha **Mungu kuwa Mungu**.

Kwa utaratibu huu yeye alijiweka huru mwenyewe kutokana na ibilisi wa Biblia aliyewateka wanadamu wote, tukiangalia jitihada zao. Uhuru huo yeye binafsi amefanikiwa kuupata, sasa anautoa uhuru huu kwa wale wote ambao hukataa na kumsulubisha ibilisi wa Biblia - 'Dhambi katika mwili' – ndani yao wenyewe na kufanywa wenyewe kuwa sehemu yake kwa kubatizwa na kisha kufanya ibada ya kumpendeza na kumtii..

IBILISI ANA NGUVU ZA MAUTI

Hapa pia tunajifunza (Waebrania 2:14) kwamba ibilisi ana nguvu za mauti. Hii ni uthibitisho mzuri zaidi kuwa ibilisi si mtu. Nguvu ya mauti inadhihirisha mamlaka ya mwisho. Kama mtu, ni Mungu pekee aliye na nguvu za mauti, kwa kuwa yeye ana uwezo wote.

Dhana potovu ya kiothodoksi kwamba Mungu angetoa na kumpa nguvu zote za mauti kiumbe mbaya kama Ibilisi ni ajabu na wazo la kuogofya. Lakini Biblia inasema Ibilisi ana nguvu juu ya kifo. Ndiyo, hiyo ni kweli. DHAMBI ina mamlaka juu ya mauti - sio kwa kumaanisha umiliki ambao Mungu tu hudhibiti, lakini kwa kumaanisha kwamba Dhambi bila shaka huleta kifo, na wote ambao hutumikia Dhambi hupokea kifo kama mshahara wake (Dhambi).

Na, licha ya ukombozi huu uliotolewa katika Kristo, Dhambi-katika-mwili-, 'sheria ya Dhambi katika viungo' huwapeleka watu kwa urahisi katika mauti ya milele. Hapa kwa kweli kuna kitu kinachomiliki 'nguvu za kifo' ikikubaliana na dhana ya Mungu kumliki nguvu zote milele.

Kazi ya Yesu, kupitia kwa **kifo**, ilikuwa kuharibu kile kilicho na nguvu za mauti: yaani, DHAMBI. Kazi ya Yesu ni kuharibu kabisa Dhambi katika nchi, kwanza katika nafsi yake, kisha kwa watu wote, na – kupitia kwa Dhambi- pia Mauti - "Tazama Mwana-kondoo wa Mungu aondoaye dhambi ya ulimwengu" (Yohana 1:29).

"Yeye huweka mbali dhambi kwa kujitoa yeye mwenyewe" (Waebrania 9:26).

DHAMBI KUHAISHWA

Tunaona kwamba Dhambi kwa uwazi inahaiishwa kama mtu ambaye ni bwana, mwangamizi na adanganyaye

"Dhambi ilivyotawala kifo" (Warumi 5 21).

"Dhambi ikafanya ndani yangu" (Warumi 7: 8).

"Dhambi ilinidanganya .. Dhambi ikaniua" (Warumi 7:11).

"Kwa yeye ambaye mnajitoa nafsi katika kumtii, mmekuwa watumwa wake, iwe ni Dhambi..." (Warumi 6:16).

"Msifadhaike dhambi isitawale ndani ya miili yenu, ambayo mkazitii" (Warumi 6:12).

Ibilisi wa Biblia ni Dhambi. Vitu vingi huahiishwa katika maandiko, kwa athari ya kuvutia na mkazo –

Utajiri: "Huwezi kuwatumikia mabwana wawili: Mungu na mali" (Mathayo 6:24).

Hekima: "Hekima umeijenga nyumba yake, amezichonga nguzo zake saba.." (Mithali 9: 1).

Israeli: "Nitakujenga Ee Bikira wa Israeli" (Yeremia 31: 4).

Yerusalemu: "Jivike mavazi yako mazuri, Ee Yerusalemu" (Isaya 52: 1).

Aliyekombolewa: "Arusi ya Mwana-kondoo ... mkewe amejijweka tayari" (Ufunuo 19: 7).

Mambo ya asili: "Mito na ipige makofi, Milima na iimbe pamoja kwa furaha," (Zaburi 98: 8)

"Enyi sehemu ya Yerusalemu palipokuwa ukiwa imbeni", (Isaya 52: 9) nk

Ibilisi, au 'mwenendo wa Dhambi, 'Dhambi katika mwili 'pia inahaiishwa chini ya jina la' Mtu wa Kale ' - "Vua kabisa utu wa kale na matendo yake" (Wakolosai 3: 9). "Mvue utu wa zamani.. mfanywe wapya katika roho na nia zenu " (Waefeso 4:22 24). "Utu wetu wa kale ulisulubiwa pamoja naye" (Warumi 6: 6).

Hii nukuu ya mwisho ni ya kuiwekea makini. Kristo ni mfano mzuri. Alisulubisha Mtu wa Kale " ibilisi 'katika maisha yake na kifo chake, hayo mawili. Hivyo lazima sisi - "Tusulubishe mwili pamoja na mawazo yake mabaya na tamaa zake" (Wagalatia 5:24). "Mkiyasafisha matendo ya mwili kwa Roho, basi, mtaishi" (Warumi 8:13). Yesu anatuambia 'chukua msalaba' na kumfuata (Mathayo 10:38). Na kwa hivyo tunaona Paulo akisema (kwa nidhamu yake kibinafsi na maisha ya kujitoa kama sadaka) alikuwa - "Alisulubishwa pamoja na Kristo" (Wagalatia 2:20).

KWA NINI UHAISHAJI NI MWINGI?

Kwa nini Maandiko yanatumia tashhisi nyingi kiasi hicho? Je, hakuna hatari ya kusababisha utata na kupotosha, kama tunavyoona suala la Ibilisi na Roho Takatifu? Si kwa watu wenye ujuzi. Si kwa wanafunzi wenye bidii, wenye kupenda Biblia. Na hawa ndio wale tu ambao ni wa muhimu kwa Mungu. Mungu kwa makusudi anawapotosha wale wasioelewa, wenye nia ya kimwili na waovu –

"Mungu awaletea nguvu ya upotevu, wauamini uongo, ili wahukumiwe wote ambao hawakuiamini ukweli" (2 Wathesalonike 2:11 12).

Haya ni maneno yenye nguvu sana, kutoka kwa Mungu mwenye upendo na rehema. Tunapaswa kumakinika nayo. Mungu kwa kweli ni Baba mwenye upendo kwa wale ambao kabisa humtafuta, lakini sio kwa wasiomcha.

Hizi hoja na mifano ya matumizi ya tashhisi yanatuangazia kwa nini Dhambi yapewa uhai. Yaonyesha, mwanzo, kwamba kanuni na vitu vyapewa uhai katika Biblia; na, pili, kwamba hii inafanywa kwa faida kubwa. Kuna uchangamfu katika mtindo huo wa kuelezea, kuliko kujieleza kunakoendana na umiliki wa sarufi na mambo halisi. Maelezo haya yanayochangamsha yanayotumiwa katika Biblia katika kila sehemu, ndivyo ilivyotumiwa katika lugha za mashariki kijumla.

Bila shaka ni wazi yaweza kutumiwa vibaya, kama vilivyo vitu vyote vizuri, lakini ufanisi wake hauna kifani. Somo la ibilisi na dhambi ni mfano bora. Dhambi ni mdanganyifu mkuu wa Mungu katika kukanusha ukuu wake, hekima na wema, na ni uwanja mkubwa wa mashtaka dhidi ya

binadamu, hata katika mauti. Hatukosei tukisema ni 'MSHITAKI, MDANGANYIFU, MWONGO.' Hii inakamilishwa kwa ufanisi mkubwa kwa matumizi ya neno 'ibilisi'. Kwa neno hili kukosa kutafsiriwa, neno limeswahilishwa---msomaji wa Kiswahili --- aliyekuzwa kwa misingi ya kitheolojia---mtu anakosa kuona hilo.

HAKUNA IBILISI KATIKA MIAKA 4000 YA AGANO LA KALE

Agano la Kale ni historia ya matukio ya shughuli za Mungu na watu kwa miaka karibu **4000**. Hakuna mahali popote katika Agano La Kale ambapo mafundisho haya ya ibilisi mtu yanaonekana. Sheria ya Musa ni mfumo wa kina sana ya kanuni na mafundisho ya dini. Hakuna mahali ndani yake ambapo kuna kidokezo kidogo cha kitu kama hicho, kama Ibilisi wa othodoksi.

Mungu huwakilishwa daima kama mkuu na ni yeye peke yake aliye mamlakani, Ni yeye tu aliye na nguvu za mauti. Uhusiano uliopo ni kati ya mtu binafsi na Mungu, na ni watu wenyewe ambao huwajibika moja kwa moja kwa Mungu kwa matendo yao wenyewe. Ni tabia ya kawaida ya binadamu kujaribu kutowajibika matendo yake na kuhamishia mtu mwingine au kitu kingine. Katika Agano la Kale, hata hivyo, hakuna mahali ambapo kumetajwa mshawishi wa kando, mtu, kitu kama malaika kinachojaribu watu. Hata hivyo kulingana na othodoksi, hili ni jitu hatari ambalo watu lazima waonywe kulihusu. Kama kungekuwa na jitu kama hili - Ibilisi wa kiothodoksi, ambalo mara kwa mara huwatega watu katika mitego yake, haingewezezana Mungu kunyamazia jambo hili bila kuwaonya watu mara kwa mara dhidi yake.

Biblia - Agano la Kale na Jipya - daima humwonya mtu dhidi ya udanganyifu mbaya wa moyo wake wenyewe, ambao ndio ibilisi wa kweli wa Biblia. Kuna vitu vichache sana vilivyotawanyika katika Agano la Kale ambavyo vinaendelea kuunga mkono wazo hili la kiothodoksi, ambalo tunapanga kuangalia katika makala haya au ya baadaye, kama vile yule nyoka wa Edeni, 'Azazeli' (cha kutokana na mbuzi aliyekuwa akitolewa kafara), 'shetani' wa Ayubu; mifano ya wafalme wa Tiro (Ezekieli 28) na wa Babeli (Isaya 14), mjadala kwa ajili ya 'mwili wa Musa (Zekaria 2; Yuda 9). Itaonekana kuwa hakuna kati ya haya yanayosaidia popote nadharia ya Ibilisi wa kiothodoksi, bali ni kinyume kabisa.

UFUNUO 12: JOKA ALIYETUPWA KUTOKA MBINGUNI

Ufunuo 12 inanukuliwa kuunga mkono nadharia ya kiothodoksi za Ibilisi. Hii, wakati inaangaliwa kwa kina na kwa umantiki, inaonekana wazi kuwa sehemu ya 'mambo ambayo hayana budi kuwako' (yaani, siku za Yohana, **Ufunuo 4: 1**).

Kwa mtazamo wa muda wa unabii wa Ufunuo, baadhi wanatuelekeza kwa Ufunuo 1:19 inayoonyesha suala linaloshughulikiwa ni la 'mambo YALIYOPO' sio 'mambo ambayo yatatukia baadaye." Ni kweli Yohana anazungumza kuhusu 'mambo YALIYOPO' na pia ya 'mambo ambayo YATAKUWA BAADA YA HAYO. 'Mambo YALIYOPO' yanashughulikiwa katika sura ya 2 na 3, yaani ujumbe kwa Eklesia (makanisa) yaliyokuwepo katika Asia Ndogo

kuhusu hali zilimokuwemo. Lakini wakati tunapokuja kwa sura ya 4, tunaambiwa kwamba sasa Yohana anazungumzia 'mambo ambayo hayana budi kuwako' (kifungu cha 1).

Ufunuo ni kitabu cha ishara. Imeelezwa kuwa ni ishara (Ufunuo 1: 1), na ni wazi kuwa ndivyo ilivyo: wanyama wenye vichwa 7, kuna chui / dubu / simba wanyama, viumbe wenye mbawa 6 wenye macho tele, milima inayochomeka ikitupwa baharini, Nzige wenye taji na wamekabithiwa nyuso za wanaume na nywele za wanawake na mikia ya nge, nk

Ufunuo 12, ambayo inazungumzia Joka aliyetupwa kutoka mbinguni, inaanza na mwanamke aliye mbinguni, amevikwa jua, mwezi chini ya miguu yake na taji na nyota 12. Joka ambalo lampinga mwanamke lina vichwa 7 na kuvikwa taji 10 za pembe. Joka hili linatoa mafuriko nyuma ya huyo mwanamke.

Dunia inafungua kinywa chake na kumeza mafuriko. Hii yote ni dhahiri (na, wakati ikitazamwa kwa jicho pevu, inaonekana kuwa hivo) ni sehemu ya matukio ya ishara yanayoonyesha mambo ya kisiasa duniani kati ya siku za Yohana na kurudi kwa Kristo. Sura hii, kama kwingineko kwingi katika kitabu chote, katuni au vibonzo hai inayofanywa kisiasa, kutoa unabii katika ishara kuonyesha matukio yanayohusiana na Ulaya na Kanisa la Katoliki, hasa kwa kuhusiana na ustawi wa watu wa kweli wa Mungu, ambao wapagani na Kanisa la Katoliki walishirikiana kuwatesa. Mlango huu unawakilisha kuinuka kwa Mfalme Konstantini na Kanisa la Katoliki kwa nguvu za kisiasa katika ufalme wa Kirumi, na matokeo ya kurushwa kwa Joka lenye nguvu la kipagani kutoka kwa mbingu za kisiasa. Utafiti wa kitabu chote, kwa kuzingatia ufahamu wa kweli wa Injili ya Ufalme, inaleta picha wazi kabisa na ya kushawishika.

NYOKA KATIKA EDENI

Maelezo ya Edeni yanazungumzia kuhusu nyoka kama mwerevu kuliko 'wanyama wengine wa kondeni,' mwenye uwezo wa kujieleza kwa kuongea kukamilisha kusudi la Mungu. (Kwa mfano kama huo, angalia Hesabu 22: 21-34). Hakuna mdokezo hata kidogo wa Ibilisi kuwa nyuma ya haya kuhamasisha na kumsukuma au kumwendesha nyoka. Matendo yake yanatokana na werevu wake kama Maandiko yanavyoshuhudia: na huyo nyoka – sio Ibilisi wa othodoksi – anahukumiwa kwa kosa lake, wakati ambapo yule ambaye kwa kawaida huchukuliwa kuwa mkosaji halisi hatajwi hata kidogo, sembuse kushtumiwa kama chanzo cha uovu. '

MALAIKA WALIOKOSA

' Kwa 'ushahidi' wa kuwepo Ibilisi, sisi tunaelekezwa kwa 'malaika waliokosa' - "Mungu hakuwaachilia malaika waliokosa, bali aliwatupa shimoni (Tartarasi) na akawatia katika vifungo vya giza , walindwe hata ije hukumu "(2 Petero 2: 4). "Na, malaika wasiolinda enzi yao wenyewe, lakini wakayaacha makao yao yaliyowahusu amewaweka katika vifungo vya milele chini ya giza kwa hukumu ya siku ile kuu" (Yuda 1:6)

Haya ndiyo yote tunayoambiwa kuhusu malaika hao waliotenda dhambi au ' wajumbe'. Ni wazi kuwa sio malaika watakatifu 'wateule' wa Mungu, kwa maana hao hawawezi kutenda dhambi. Wazo kwamba wanaweza kutenda dhambi inatokana na hadithi za kipagani, ambapo 'miungu' daima hutenda dhambi. Malaika watakatifu wa Mungu wana miili ya kutokuharibika, na dhambi na kutokufa kabisa haviwezi kushirikiana katika picha safi ya Biblia. Kumbuka pia kwamba malaika hao wanaotenda dhambi (kama wapo) 'wamehifadhiwa katika vifungo vya giza' (bila shaka ni kifo) KWA (siku za baadaye) wakati wa hukumu'. Kwa hakika hawawezi kuwa malaika wa Ibilisi wa othodoksi wanaozurura ovyo wakifanya mapenzi ya Ibilisi.

Kwa vyovyote vile, wao hawachangii nadharia ya Ibilisi. Hata hatuambiwi ni akina nani. Ni wazi kutokana na jinsi Paulo anavyowarejelea katika kifungu hicho ilikuwa inajulikana kuhusu hicho kijulikanacho kwa neno hili 'malaika' - habari ambayo hatuna. Lakini ikiwa Mungu hajaona tunapaswa kuambiwa zaidi kuwahusu wao kuliko alivyotuambia, ni vyema tusibashiri. Hakika 'malaika' waliofungwa minyororo wanaosubiri hukumu haichangii kuunga mkono mafundisho ya kiothodoksi.

ISAYA 14: LUSIFA, MWANA WA ASUBUHI

Othodoksi inatupeleka kwa Isaya 14:12 - "Jinsi ulivyoanguka kutoka mbinguni, Ewe nyota ya alfajiri, mwana wa asubuhi!"

Watu wa makanisa wanatuambia huyu ni Ibilisi wao, aliye na nguvu nyingi za ushindi, wakati huo huo anawajaribu mabilioni na kuwatesa mabilioni, na milele akitawala juu ya jamii ya binadamu wengi kuliko ambavyo Mungu anaweza kufanya sasa au atakavyoweza kufanya. Lakini Biblia inasema huyu Lusifa ni 'mtu' (mstari 16), huwa dhaifu (m.10), Mfalme wa Babeli (m.4), yumo kaburini na kafunikwa na funza (Mst 11).

EZEKIELI 28: KERUBI ALIYEPAKWA MAFUTA

Kisha tunapelekwa kwa Ezekieli 28: 12-14 - "Kerubi mwenye kutiwa mafuta katika bustani ya Mungu mkamilifu wa uzuri....".

Lakini ukweli uko wapi? Biblia inasema ni nani? Biblia inasema kwamba ni 'mkuu wa Tiro,' ni 'mtu' (kifungu cha 2), wa kufa, atauawa, na kuletwa shimoni (vifungu 8-10). Ni ukaidi kwa Ukristo wa jadi kuona ni muhimu kung'ang'ania maneno hayo – ambayo yaonyesha waziwazi na katika hali zote kuwa watu wale ambao Mungu amewabainisha na kuwalaani --- kujaribu kutoa mafundisho hayo ya Ibilisi! Kwa nini? Kwa sababu tu hakuna maandiko halali ya kuunga mkono wazo hili la kipagani linalotoka katika hadithi za mataifa ya Misri, Ugiriki, Roma, nk. Wakati tunapoangalia katika vifungu vinavyounganishwa pamoja ili kutoa picha ya Ibilisi kama ilivyotolewa na Ukristo wa jadi, tunapata hakuna kitu pale isipokuwa dhana na matumizi mabaya yasiyofaa.

MASWALI kwa Somo la 18

1. Kwa mujibu wa mafundisho yenye umaarufu, yanayojulikana na wengi, ni nani ambaye amefanikiwa zaidi katika kuyanasa maisha ya watu, Mungu au Ibilisi?
2. Je, ni muhimu kuelewa ni nani au nini ni ibilisi wa Biblia?
3. Madhumuni na kazi ya Yesu kuhusiana na ibilisi ilikuwa nini?
4. Kwa nini Yesu alikuwa na asili ya mwili kama wetu?
5. Hii ilimwezesha vipi 'kumharibu ibilisi'?
6. Je, kuwa na mwili na damu, na kufa, ingemwezesha kumwagamiza Ibilisi yule anayefundishwa na othodoksi?
7. Je, mtenda dhambi aishie milele, au mwenye dhambi asiyepatikana na mauti, ni kitu kinachowezezekana katika maandiko?
8. Ibilisi wa Biblia ni nini?
9. Je, kuna mtu yeyote aliye na 'nguvu za mauti' isipokuwa Mungu?
10. Je, dhambi inawezaje kuwa na 'nguvu za mauti'?
11. Kazi ya Yesu ya mwisho kuhusiana na dhambi na mauti ni nini?
12. Hatua ya kwanza katika kuitekeleza kazi hii ilikuwa ipi?
13. Kwa nini Biblia hutumia uhaishaji sana?
14. Na hatari ya kutokueleweka (kama othodoksi inavyokosa kuelewa uhaishaji wa Roho, na Ibilisi)?
15. Ni akina nani ambao Mungu huwatumia 'nguvu ya upotevu ili wapate kuamini uwongo?
16. Mungu amewahi kuwaonya Waisraeli kuhusu Ibilisi mtu, au Ibilisi malaika?
17. Je, Yeye amewahi kuwatahadharisha juu ya nyoyo zao mbaya na tabia ya dhambi?
18. Ufunuo 12 inahusu nini?
19. Twajuaje hairejelei kuanguka kutoka mbinguni kwa 'ibilisi' wa othodoksi?
20. Je, Ibilisi ametajwa popote kuhusiana na matukio katika Edeni?
21. Tunawezaje kuwa na uhakika kuwa 'malaika waliokosa' hawakuwa na uhusiano wowote na Ibilisi wa othodoksi?

22. 'Nyota ya Asubuhi' -Lusifa ni nani katika Isaya 14?

23. 'Aliyepakwa mafuta' wa Ezekieli 28 ni nani?